

Chombra pitschna s'enclina avant la branscha d'electricitad

Tensiun tranter dretgira e parlament appartegnent il martgà d'electricitad

DA CLAUDIA CADRUVI / ANR

■ **Strusch ch'il tribunal federal prenda ina decisiun malempernaivla per tscherts concerns d'energia emprova la chombra pitschna da midar la lescha a favur da la branscha. Ier è quai capità per la segunda giada entaifer in onn. Il cussegl naziunal po anc curreger quest enclin politic.** In pur sursilvan che posseda trais indrizs fotovoltaics ha gudagnà questa stad al tribunal federal ses cumbat encunter la cumissiun d'electricitad (ElCom) ed encunter la Repower (guarda LQ dals 11 da settember). El dastga tscherner sez il servetsch da mesurar il current ch'el spisgenta en la rait. Il tribunal federal punctuescha che questas mesiraziuns suttastattan a la libertad economica e n'èn betg monopolisadas tar ils gestiunaris da rait (Netzbetreiber). Ier ha la chombra pitschna decidì ina midada da la lescha per che las mesiraziuns possian vegnir fatgas be pli da gestiunaris da rait sco per exempel la Repower.

«Agid tranter amis»

Gist quai ha la «Handelszeitung» tematisà l'emna passada sut il titel «Agid tranter amis»: La mesadad dals sez en la cumissiun d'energia da la chombra pitschna saja occupada cun politichers che retirian pajas dals concerns d'energia, scriva la gasetta. Uschia sesia era *Martin Schmid* en il cussegl da fundaziun da la Repower. Tals «lobists» sustegnian in l'auter sch'i giaja persuerter da curreger las consequenzas da sentenzias malempernaivlas per ils baruns d'energia. La cu-

missiun da la chombra pitschna intradeschia lura simplamain ina midada tenor il gust dals concerns. «Il lobing dals concerns d'energia è massiv», tradescha il cusseglier naziunal *Christian Wasserfallen* a la «Handelszeitung».

Adossar auts custs als consumers?

Tenor il medem recept ha la chombra pitschna gia empruvà da «curreger» l'onn passà ina sentenza. Il tribunal federal aveva decidì ch'els concerns na dastgian, tenor l'uschenumnada «Durchschnittspreismethode», betg mo laschar profitar ils clients gronds dal current bunmartgà ch'els cumprian sin la fiera libra. Era las chasadas ed ils

clients pitschens hajan dabun ina reducziun dal pretsch da current, uschia il tribunal federal.

La chombra pitschna aveva curt suenter midà la lescha e decidì che las interpresas d'energia dastgan adossar ils custs aults da l'atgna producziun cumplainamain a las chasadas ed als clients pitschens. Il cussegl naziunal n'è dentant betg stà d'accord ed ha vulì tractar la dumonda davart l'uschenumnada «Durchschnittspreismethode» en ina fatschenta separada.

Ier ha la chombra pitschna tegnì ferm vi da sia varianta cun 28 cunter 12 vuschs e quatter abstenziuns. La fatschenta turna puspè en il cussegl naziunal.



Cusseglial dals chantuns Martin Schmid sesa en il cussegl administrativ da Repower. KY